

LÖG EININGAR-IÐJU

Samþykkt á aðalfundi 6. apríl 2017



Lög Einingar-Iðju

I. Kafli – Heiti félagsins og hlutverk

1. grein – Nafn og hlutverk

Félagið heitir Eining-Iðja. Starfs- og félagssvæði þess er Akureyri, Dalvíkurbyggð, Fjallabyggð og allir hreppar Eyjafjarðarsýslu. Ennfremur Svalbarðsstrandar- og Grýtubakkahreppur í Suður-Þingeyjarsýslu. Félagið er aðili að Alþýðusambandi Norðurlands, Starfsgreinasambandi Íslands og Alþýðusambandi Íslands. Einnig getur félagið sótt um og gerst aðili að öðrum landssamböndum ef það er talið eiga við vegna starfsgreina.

Félagið skal vera starfsgreinaskipt samkvæmt reglugerð samþykktri af aðalfundi.

Heimili félagsins og varnarþing er á Akureyri.

2. grein – Tilgangur

Tilgangur félagsins er:

- Að sameina allt launafólk sem starfar á félagssvæðinu.
- Að vinna að sameiginlegum hagsmunamálum félagsmanna, svo sem með því að semja um kaup og kjör, bættan aðbúnað við vinnu og gæta þess að ekki sé gengið á rétt félagsmanna.
- Að vinna að fræðslu- og menningarmálum.

3. grein – Starfssvið

Félagið kappkostar að standa vörð um hagsmunamál allra þeirra sem starfa á félagssvæðinu og falla undir kjarasamninga Starfsgreinasambands Íslands og þá sérsamninga sem félagið gerir.

4. grein – Inngönguskilyrði

Inngöngu í félagið geta þeir fengið sem:

- Vinna þau störf sem falla undir kjarasamninga þeirra landssambanda sem getið er í 1. grein.
- Eru fullra 16 ára.
- Standa ekki í óbættum sökum við félagið eða önnur stéttarfélög innan ASÍ.

5. grein – Innganga í félagið

Umsækjendur um félagsaðild skulu óska aðildar að félaginu með inntökubeiðnum eða með skilum á gjöldum til félagsins.

Nú hefur launamaður, sem ekki hefur sótt um félagsaðild, greitt félagsgjald í samræmi við ákvörðun aðalfundar félagsins á hverjum tíma, skal félagið innan 6 mánaða eftir að

félagsgjaldi var fyrst skilað senda viðkomandi tilkynningu um staðfestingu á inngöngu í félagið. Geri hann ekki athugasemdir um aðild innan 10 daga frá dagsetningu tilkynningarinnar telst hann orðinn félagsmaður.

Ekki er þörf sérstakrar staðfestingar ef fjarvera úr félaginu varir eigi lengur en 6 mánuði samfelld.

Um iðgjöld þeirra, sem ekki kjósa að gerast félagsmenn, gilda ákvæði kjarasamninga félagsins á hverjum tíma.

Sé vafi um rétt til aðildar skal stjórn félagsins úrskurða um málið. Unnt er að skjóta þeim úrskurði til trúnaðarráðs og úrskurði þess til framkvæmdastjórnar SGS og miðstjórnar ASÍ.

6. grein – Aukafélagar

Heimilt er að taka í félagið sem aukafélaga unglinga innan 16 ára aldurs, þá sem greiða til félagsins en hafa ekki óskað eftir inngöngu sbr. 5. gr. og aðra sem stunda vinnu samkvæmt þeim samningum sem félagið hefur gert og starfa á starfssvæði félagsins um stundarsakir en eru félagar í öðru félagi.

Aukafélagar greiða fullt gjald til félagsins meðan þeir eru á félagssvæðinu, hafa málfrelsi og tillögurétt á fundum félagsins en hvorki atkvæðisrétt né kjörgengi.

Samninganefnd getur þó ákveðið við afgreiðslu einstakra mála, í tengslum við kjarasamninga, að aukafélagar hafi atkvæðisrétt.

Skyldur félagsins gagnvart aukafélögum eru hinar sömu og gagnvart aðalfélögum.

7. grein – Starfsgreinadeildir félagsins

Félagið er deildaskipt eftir starfsgreinum. Trúnaðarráð tekur ákvörðun um myndun starfsgreinadeilda skv. ákvæðum 18. gr. Formenn og varaformenn starfsgreinadeilda eru sjálfkjörnir í stjórn félagsins.

Nánar er kveðið á um starfsgreinadeildirnar og kjör stjórnar í reglugerð samþykktri af aðalfundi.

8. grein – Svæðisfulltrúar

Á félagssvæðinu skulu starfa 3 svæðisfulltrúar og varamenn þeirra. Þeir eiga að vera staðsettir utan Akureyrar. Svæðisfulltrúar eru sjálfkjörnir í stjórn félagsins.

Nánar er kveðið á um svæðisfulltrúa og kjör þeirra í reglugerð samþykktri af aðalfundi félagsins.

9. grein – Úrsagnir

Úrsögn úr félaginu skal tilkynna með formlegum hætti til skrifstofu félagsins.

Félagsmenn halda félagsréttindum meðan þeir gegna trúnaðarstörfum í verkalýðshreyfingunni.

Enginn getur sagt sig úr félaginu eftir að atkvæðagreiðsla um vinnustöðvun hefur verið auglýst eða ákvörðun um vinnustöðvun hefur verið tekin af félaginu og þar til vinnustöðvuninni hefur verið formlega aflýst. Einnig er óheimilt að segja sig úr félaginu til þess að taka upp störf félagsmanna í öðru félagi er lagt hafa niður vinnu vegna deilu.

II. Kafli – Réttindi og skyldur félagsmanna, réttindamissir, brottrekstur

10. grein – Réttindi félaga

Réttindi félagsmanna og greiðenda til sjóða félagsins eru eftirfarandi:

- a) Auk annarra réttinda njóta fullgildir félagar málfrelsis, tillögu- og atkvæðisréttar á félagsfundum svo og kjörgengi.
- b) Atkvæðisréttur um kjarasamninga fer eftir nánari ákvörðun samninganefndar.
- c) Réttur til styrkja úr sjóðum félagsins, að uppfylltum þeim skilyrðum sem sett eru í reglugerðum sjóðanna.
- d) Réttur til að vinna eftir þeim kjörum sem samningar félagsins ákveða hverju sinni.
- e) Réttur til aðstoðar félagsins vegna vanefnda atvinnurekenda á samningum.

11. grein – Skyldur félagsmanna

Skyldur félagsmanna eru:

- a) Að hlíta lögum félagsins, fundarsköpum, fundarsamþykktum og samningum í öllum greinum.
- b) Að sjá til þess að félagsgjöld séu dregin af launum sínum.
- c) Að gegna trúnaðarstörfum fyrir félagið. Þó getur starfandi stjórnarmaður, sem verið hefur 3 ár eða lengur í stjórn félagsins samfelld, skorast undan endurkjöri í jafnlangan tíma. Sama regla skal gilda um önnur trúnaðarstörf fyrir félagið nema trúnaðarmenn á vinnustöðum, þar skal gilda ákvæði í reglugerð um trúnaðarmenn.
- d) Að stuðla að því að ófélagsbundnir menn gangi í stéttarfélagið og tilkynna til félagsins brot á lögum og samþykktum félagsins.

12. grein – Félagsgjöld og réttindamissir

Félagsgjöld eru ákveðin á aðalfundi og skulu innheimt sem ákveðið hlutfall af launum en þó er heimilt að ákveða lágmarks- og hámarksgjald.

Félagsmaður, sem skuldar lögboðin gjöld til félagsins fyrir 6 mánuði eða meira, nýtur ekki fullra félagsréttinda, svo sem atkvæðisréttar, kjörgengis né styrkja úr sjóðum félagsins. Félagsréttindi öðlast hann ekki á ný fyrr en skuldin er að fullu greidd.

Sá sem ekki hefur greitt til félagsins í 6 mánuði skal stríkaður út af félagaskrá.

Ákvæði 2.-4.mgr. gilda ekki um þá félagsmenn sem sýnt geta fram á að iðgjöld þeirra til félagsins hafi verið dregin af launum þeirra skv. reglulega útgefnum launaseðlum enda hafi þeir tilkynnt félaginu um vanskil þeirra iðgjalda án ástæðulausra tafa eftir að þeim urðu vanskilin kunn.

Á meðan atvinnulaus félagsmaður greiðir félagsgjöld af atvinnuleysisbótum sínum heldur hann fullum félagsréttindum.

Þrátt fyrir framanskráðar reglur skulu heiðursfélagar halda félagsréttindum sínum án tillits til greiðslu félagsgjalda. Ennfremur skulu þeir, sem orðnir eru 67 ára og hafa verið félagsmenn eigi skemur en 5 ár, halda félagsréttindum sínum þó þeir greiði ekki félagsgjöld, enda hafi þeir ekki gengið í önnur verkalýðsfélög. Þegar menn verða sjötugir missa þeir þó rétt til að taka þátt í atkvæðagreiðslum um aðalkjarasamninga eða boðun vinnustöðvunar til að knýja fram kjarasamninga, nema þeir sem enn eru á vinnumarkaði.

13. grein – Viðurlög

Ef fullgildur félagsmaður er sakaður um brot á lögum félagsins, samningum þess við vinnuveitendur eða vinnur gegn hagsmunum þess skal málið tekið fyrir á stjórnarfundum sem ákveður með einföldum meirihluta atkvæða hvort veita skuli áminningu eða svipta hann réttindum fullgildra félagsmanna.

Hver sá maður getur sætt missi fullgildrar félagsaðildar í félaginu, í lengri eða skemmri tíma sem að álit stjórnar hefur unnið gegn hagsmunum félagsins, bakað því tjón eða gert því eitthvað til vansa, svo og hver sem ekki hlýðir lögum þess eftir gefna áminningu í félaginu. Skjóta má þeim úrskurði til trúnaðarráðs.

Úrskurði trúnaðarráðs um áminningu eða réttindamissi félagsmanns má vísa til viðkomandi landssambands og Alþýðusambands Íslands, en úrskurður trúnaðarráðs gildir þar til sambandið ákveður annað.

Hafi félagsmaður misst stöðu fullgilds félagsmanns í félaginu á hann ekki rétt til þeirrar stöðu að nýju nema með samþykkt á stjórnarfundum.

III. Kafli – Stjórn og trúnaðarráð

14. grein – Stjórn

Stjórn félagsins skipa eftirtaldir stjórnarmenn:

- a) Formaður
- b) Varaformaður
- c) Ritari
- d) Meðstjórnandi
- e) Formenn starfsgreinadeilda
- f) Varaformenn starfsgreinadeilda
- g) Svæðisfulltrúar

Kjöri stjórnarmanna skal lýst á aðalfundi. Leitast skal við að stjórn félagsins sé þverskurður af félagsmönnum og skal gætt jafnræðis milli starfsgreina, kynja og aldurs.

15. grein – Störf stjórnar

Stjórnin hefur á hendi yfirstjórn allra félagsmála milli félagsfunda. Stjórnin boðar til félagsfunda, sbr. 21. gr. Hún ræður starfsmenn félagsins, ákveður laun þeirra og vinnuskilyrði.

Ráðnir starfsmenn félagsins skulu vera félagsmenn í Einingu-Iðju.

Stjórnin ber sameiginlega ábyrgð á eigum og fjárhag félagsins. Skyld er stjórn félagsins að stuðla að því að allt er varðar sögu félagsins sé sem best varðveitt.

Þegar félagsmaður lætur af trúnaðarstörfum fyrir félagið, skal hann skila af sér öllum þeim gögnum, er hann kann að hafa undir höndum varðandi störf þau, er hann hefur annast fyrir félagið, sem varðveislugildi hafa eða geta komið eftirmanni hans að gagni við störf sín.

16. grein – Formaður

Formaður félagsins kveður til stjórnarfunda og stjórnar þeim. Formanni er skylt að halda stjórnarfund óski a.m.k. þrír (3) stjórnarmenn eftir því. Formaður gætir þess að allir stjórnarmenn geri skyldu sína. Hann hefur eftirlit með starfsemi félagsins og eftirlit með því að lögum þess og samþykktum sé fylgt í öllum greinum.

Formaður skal vera starfsmaður félagsins. Stjórnin gerir ráðningarsamning við hann og semur við hann um kjör hans.

Formaður og varaformaður félagsins skulu ekki eiga sæti í svæðisráði eða stjórn starfsgreinadeilda.

Varaformaður gegnir skyldum formanns í forföllum hans.

17. grein – Ritari

Ritari ber ábyrgð á því að gerðarbækur félagsins séu haldnar og færðar í þær allar fundargerðir og lagabreytingar. Hann undirritar gerðarbækur félagsins ásamt formanni eða fundarstjóra.

Heimilt er að skrá fundargerðir á tölvu. Skulu fundargerðir stjórnarfunda sendar öllum sem fundinn sátu ekki síðar en fyrir næsta fund.

Heimilt er að taka fundi félagsins upp á hljóð- og/eða myndband.

Að loknu starfsári skal ritari sjá til þess að allar fundargerðir félagsins og deilda þess séu teknar saman í hefti í þremur eintökum. Skal eitt eintak geymt á öruggum stað utan skrifstofunnar og tvö hjá félaginu.

18. grein – Trúnaðarráð

Trúnaðarráð skal vera starfandi í félaginu. Í ráðinu eiga sæti 100 manns auk stjórnarmanna, varaformanns hvernar starfsgreinadeilda og varasvæðisfulltrúa.

Formaður félagsins skal vera formaður trúnaðarráðs og ritari félagsins ritari þess.

Formaður kveður trúnaðarráð til funda með a.m.k. sólarhrings fyrirvara. Skylt er formanni að boða trúnaðarráð til fundar ef þriðjungur þess óskar og tilgreinir fundarefni.

Trúnaðarráðsfundur er löglegur ef löglega er til hans boðað.

Formaður getur í nafni félagsstjórnar kallað saman trúnaðarráð stjórninni til aðstoðar þegar félagsleg vandamál ber að höndum og ekki eru tók á að ná saman félagsfundi, og ræður einfaldur meirihluti úrslitum í slíkum málum.

Trúnaðarráð kys samninganefnd félagsins í samræmi við 20. gr. hér á eftir og ber ábyrgð á kjarasamningagerð þess. Einnig skal trúnaðarráð skipa formann kjörstjórnar, þegar við á skv. 19. grein.

Trúnaðarráð tekur ákvörðun um myndun eða fækkun/fjölgun starfsgreinadeilda og hverjir séu í hverri deild.

Trúnaðarráð tekur ákvörðun um myndun eða fækkun/fjölgun svæðisfulltrúa og hvar þeir skulu vera staðsettir.

Trúnaðarráð leggur fram lista með fulltrúum á þing og ársfundi þeirra samtaka sem félagið er aðili að.

Trúnaðarráð er kjörið skv. ákvæðum 23. gr.

19. grein – Kjörstjórn

Kjörstjórn skal vera starfandi í félaginu. Hlutverk hennar er að annast um stjórnarkjör, stjórna atkvæðagreiðslum um kjarasamninga, verkföll og allsherjaratkvæðagreiðslur skv. lögum félagsins, lögum ASÍ og reglugerðum settum samkvæmt þeim.

Kjörstjórnin skal kjörin af aðalfundi og í henni skulu eiga sæti tveir menn og tveir til vara. Við stjórnun atkvæðagreiðslna um kjarasamninga og verkföll skipar trúnaðarráð þriðja stjórnarmanninn og skal hann vera formaður kjörstjórnar.

Við stjórnun allsherjaratkvæðagreiðslna um önnur atriði skv. lögum félagsins og/eða lögum ASÍ skipar miðstjórn ASÍ þriðja kjörstjórnarmanninn og skal hann vera formaður kjörstjórnar.

20. grein – Samninganefnd

Samninganefnd félagsins skal skipuð 50 einstaklingum. 38 eru tilnefndir af starfsgreinadeildum í hlutfalli við stærð. Frá stjórn koma formaður, varaformaður, ritari og svæðisfulltrúar. Trúnaðarráð skipar í þau sæti sem eftir eru með tilliti til starfsgreina og/eða vinnustaða.

Umboð samninganefndar fellur niður þegar aðalkjarasamningar og tengdir sérkjarasamningar hafa verið samþykktir. Stjórn félagsins eða formaður í umboði hennar sjá um gerð kjarasamninga á milli starfstíma samninganefnda.

- a) Formaður félagsins og varaformaður skulu sjálfskipaðir í nefndina. Skal formaður vera formaður samninganefndar og varaformaður skipar það sæti í forföllum hans. Nefndin kys úr sínum hópi ritara fundargerða og varamann hans.
- b) Hver starfsgreinadeild skal tilnefna þann fjölda samninganefndarmanna, sem stjórn félagsins heimilar henni.
- c) Trúnaðarráð staðfestir framkomnar tilnefningar og skipar nefndarmenn, án tilnefningar, þar til fullri tölu er náð, ef tilnefningar eru ekki nægilega margar.
- d) Samninganefnd kemur fram fyrir hönd félagsins við gerð kjarasamninga. Samninganefnd hefur meðal annars umboð til þess að setja fram kröfugerð félagsins, gera áætlun um skipulag viðræðna um endurnýjun kjarasamninga, gera tillögur að samningum, taka þátt í samningaviðræðum og slíta þeim, óska milligöngu sáttasemjara um samningaumleitanir og undirrita kjarasamninga.
- e) Samninganefndinni er heimilt:
 1. Að fela stjórn félagsins umboð sitt til gerðar kjarasamnings og undirritunar hans.
 2. Að fela undirnefndum umboð sitt til að gera og undirrita sérkjarasamninga.
 3. Að fela sameiginlegri samninganefnd fleiri félaga eða sambanda umboð sitt til samningagerðar að hluta eða öllu leyti.
 4. Að kveða á um sameiginlega atkvæðagreiðslu félagsmanna hlutaðeigandi félaga eftir því sem nefndin kann að ákveða hverju sinni eða kann að semjast með kjarasamningi.
 5. Að aflýsa vinnustöðvun og fresta boðaðri vinnustöðvun, einu sinni eða oftar um allt að 28 sólarhringa samtals eða fela stjórn félagsins umboð sitt til þess.

Komi til atkvæðagreiðslu í samninganefndinni ræður einfaldur meirihluti.

- f) Ákvarðanir samninganefndar um að fela sameiginlegri samninganefnd fleiri félaga umboð sitt um sameiginlegar atkvæðagreiðslur og um að aflýsa eða fresta vinnustöðvun eru því aðeins lögmætar og bindandi að þær hafi verið samþykktar með $\frac{3}{4}$ hlutum greiddra atkvæða á lögmætum samninganefndarfundi.
- g) Enginn nema samninganefnd, og í umboði hennar undirnefnd eða formaður, geta gert bindandi kjarasamninga fyrir félagið eða einstaka starfshópa innan þess.
- h) Samninganefnd er heimilt að skipta með sér verkum eftir samningssviðum. Samninganefnd getur falið framkvæmdastjórn, sem skipuð er formanni, varaformanni og formönnum starfsgreinadeilda, að vinna að ákveðnum verkefnum milli samninganefndarfunda.
- i) Trúnaðarráð skal leita eftir tilnefningum í samninganefnd svo tímanlega að ný samninganefnd geti hafið undirbúning að nýjum aðalkjarasamningi minnst fimm mánuðum áður en gildandi kjarasamningar renna út.

IV. Kafli – Fundir og stjórnarkjör

21. grein – Félagsfundir

Félagsfundir skulu haldnir þegar félagsstjórn álitur þess þörf eða minnst 50 fullgildir félagsmenn óska þess við stjórn félagsins og tilgreina fundarefni.

Fundir skulu boðaðir með minnst sólarhrings fyrirvara með uppfestum auglýsingum, í útvarpi eða bréflega. Þó má í sambandi við vinnudeilur boða fund með skemmri fyrirvara. Fundur er lögmætur ef löglega er til hans boðað.

Fundum félagsins skal stjórnað eftir almennum fundarsköpum. Komi upp ágreiningsatriði um fundarsköp úrskurðar fundarstjóri hverju sinni með rökstuddum úrskurði. Komi fram ósk um skriflega atkvæðagreiðslu á félagsfundi er fundarstjóra skylt að verða við þeirri ósk.

Afl atkvæða ræður úrslitum mála á fundum, nema þar sem lög þessi ákveða annað.

22. grein – Aðalfundur

Aðalfundur félagsins skal haldinn fyrir lok maí ár hvert. Aðalfundur skal boðaður með dagskrá með minnst 7 sólarhringa fyrirvara og er hann lögmætur ef löglega er til hans boðað.

Á aðalfundi skulu tekin fyrir þessi mál:

1. Skýrsla stjórnar fyrir liðið starfsár.
2. Endurskoðaðir reikningar félagsins lagðir fram til afgreiðslu.
3. Lýst kjöri stjórnar félagsins og tilgreint hverjir taka sæti í stjórn sem sjálfkjörnir stjórnarmenn.
4. Kosning tveggja félagslegra skoðunarmanna og tveggja til vara.
5. Kosning löggilts endurskoðanda félagsins.
6. Kosning til annarra stjórna, nefnda og ráða sem lög og reglugerðir félagsins gera ráð fyrir.
7. Kosning tveggja manna í kjörstjórn og tveggja til vara.
8. Kosning á fulltrúum í fulltrúaráð Lífeyrissjóðs félagsins.

9. Lagabreytingar, ef fyrir liggja.
10. Ákvörðun félagsgjalda, ef tillaga um breytingar liggur fyrir.
11. Ákvörðun um laun stjórnarmanna.
12. Önnur mál.

23. grein – Stjórnarkjör og kosning trúnaðarráðs

Skýlt er að viðhafa allsherjaratkvæðagreiðslu við kjör trúnaðarráðs og stjórnar, annarra en þeirra sem sjálfkrafa eiga sæti í stjórn og skal tilhögun hennar fara eftir reglugerð ASÍ.

Stjórn félagsins skal kosin til tveggja ára sem hér segir: Annað árið formaður og ritari, en hitt árið varaformaður og meðstjórnandi.

Trúnaðarráð er kjörið til eins árs í senn.

Formaður, varaformaður, ritari og meðstjórnandi félagsins eru kjörin persónubundinni kosningu. Trúnaðarráð er kjörið með listakosningu.

Þegar auglýst er eftir tillögum vegna stjórnarkjörs eða listum til trúnaðarráðs er hverjum fullgildum félagsmanni heimilt að leggja fram tillögur um menn í eitthvert, einhver eða öll stjórnarsætin, sem kjósa skal til. Hverri tillögu eða framboðslista skulu fylgja meðmæli minnst 80 fullgildra félagsmanna, nema lista, sem trúnaðarráð leggur fram. Tilgreint skal með skýrum hætti til hvaða stjórnarsætis tillaga er gerð um mann eða menn.

Í janúar ár hvert skal á fundi stjórnar kjósa uppstillingarnefnd fyrir félagið. Sjö félagsmenn skulu eiga sæti í nefndinni, þar af tveir búsettir utan Akureyrar. Nefndin fái tillögur frá starfsgreinadeildum um fólk í trúnaðarráð m.v. fjölda í hverri deild, þó að hámarki 93 manns, og skal það tryggt að tilnefningin sé í takt við skiptingu félagsmanna á starfssvæði félagsins. Uppstillingarnefndin hefur 7 sæti til að setja inn nöfn einstaklinga þegar henni finnst vanta tilnefningar eftir starfsgreinum eða svæðum.

Uppstillinganefnd skilar tillögu sinni um lista til trúnaðarráðs að svo búnu til kjörstjórnar félagsins. Skal sá listi ætíð nefndur A-listi.

Uppstillinganefnd gerir jafnframt tillögu til trúnaðarráðs um kosningu formanns, varaformanns, ritara og meðstjórnanda sem öll skulu kosin persónubundinni kosningu. Trúnaðarráð tekur þær til umræðu og afgreiðslu og skilar síðan til kjörstjórnar félagsins tillögum sínum

Að lokinni tillögugerð uppstillinganefndar og trúnaðarráðs auglýsir kjörstjórn félagsins framkomnar tillögur og framboðslista til trúnaðarráðs. Gefa skal félagsmönnum a.m.k. 7 sólarhringa frest til að bera fram aðrar tillögur eða lista. Er hvert það framboð gilt sem fram kemur innan þess tíma, er fullmannað og hefur skriflegt samþykki þeirra sem eru í framboði og meðmæli a.m.k. 80 fullgildra félaga.

Komi fram fleiri en einn listi eða tillögur um stjórnarmenn sem kjörnir eru beinni persónulegri kosningu skal kjörstjórn láta kjósa um á milli þeirra í allsherjaratkvæðagreiðslu sem fram fari í síðasta lagi tveimur vikum fyrir aðalfund félagsins.

Komi hins vegar ekki fram fleiri listar eða tillögur teljast þeir félagsmenn sem trúnaðarráð hefur gert tillögu um sjálfkjörnir.

Kosningu skal lýst á aðalfundi og tekur þá nýkjörin stjórn við félaginu.

V. Kafli – Fjármál

24. grein – Útgjöld

Af tekjum félags skal greiða öll útgjöld þess. Við meiriháttar ráðstafanir á eignum félagsins þarf samþykki stjórnar.

25. grein – Skoðunarmenn og löggilt endurskoðun sjóða félagsins

Tveir félagslegir skoðunarmenn skulu yfirfara reikninga félagsins fyrir liðið reikningsár og gera athugasemdir sínar við þá. Skoðunarmenn eru kosnir á aðalfundi. Hlutverk þeirra er m.a. að hafa eftirlit með því að fjármunum félagsins sé varið til þeirra verkefna sem félagsfundur og/eða stjórn hafa ákveðið.

Auk athugunar hinna félagskjörnu skoðunarmanna er stjórn félagsins skylt að láta löggiltan endurskoðanda endurskoða reikninga og fjárreiður félagsins í lok hvers reikningsárs. Reikningar félagsins skulu liggja frammi, til skoðunar fyrir félagsmenn, 7 dögum fyrir aðalfund. Löggiltan endurskoðanda félagsins skal kjósa á aðalfundi félagsins.

26. grein – Sjóðir félagsins

Sjóðir í eigu eða vörslu félagsins skulu vera: Félagssjóður, sjúkrasjóður, orlofssjóður, vinnudeilusjóður, byggingasjóður, fræðslusjóður, Hússjóður Dalvíkur, Hússjóður Fjallabyggðar svo og aðrir sjóðir sem stofnaðir kunna að verða.

Allir sjóðir félagsins aðrir en félagssjóður skulu hafa sérstaka reglugerð sem samþykkja þarf á aðalfundi. Reglugerðum sjóða má aðeins breyta á aðalfundi. Reglugerð hvers sjóðs skal tilgreina hlutverk sjóðsins, hverjar tekjur hans skuli vera, hvernig verja skuli fé hans og hvernig honum skuli stjórnað. Reglugerðir, sem vitnað er til í lögum þessum, skulu bornar upp til samþykktar á aðalfundi félagsins, og taka gildi hljóti þær samþykki einfalds meirihluta fundarmanna.

Sjóðir félagsins skulu ávaxtaðir á tryggan hátt í ríkisskuldabréfum, í ríkistryggðum skuldabréfum í bönkum eða í sparisjóðum, í skuldabréfum tryggðum með veði í fasteign eða á annan hátt er stjórn félagsins metur tryggan og sem samræmist reglum ASÍ þar að lútandi.

Tekjur félagsins skiptast á milli sjóðanna samkvæmt ákvæðum í reglugerðum þeirra.

Félagssjóður greiðir allan almennan kostnað af starfsemi félagsins en þó skulu aðrir sjóðir standa straum af kostnaði hvers þeirra um sig skv. reglugerðum þeirra.

Um fjármál félagsins fer skv. lögum og viðmiðunarreglum ASÍ.

VI. Kafli – Lagabreytingar og allsherjaratkvæðagreiðsla

27. grein – Lagabreytingar

Lögum þessum má breyta á aðalfundi félagsins enda hafi breytinganna verið getið í fundarboði. Einnig er heimilt að breyta lögum á félagsfundi, hafi lagabreytingarnar áður verið ræddar á félagsfundi og breytinganna getið í fundarboði. Jafnframt er heimilt að breyta lögum félagsins með allsherjaratkvæðagreiðslu skv. reglugerð ASÍ þar að lútandi.

Til þess að breytingin nái fram að ganga á fundi verður hún að vera samþykkt með 2/3 hlutum greiddra atkvæða fullgildra félagsmanna. Meirihluta atkvæða þarf til lagabreytinga í allsherjaratkvæðagreiðslu.

Um sameiningu félaga skal kosið í allsherjaratkvæðagreiðslu.

Breytingar á lögnum koma fyrst til framkvæmda er miðstjórn ASÍ og hlutaðeigandi landssamband hefur staðfest þær.

Tillögu til laga- eða reglugerðabreytinga, sem einstakir félagsmenn vilja koma á framfæri, skal skila til félagsstjórnar eigi síðar en tveimur vikum fyrir aðalfund.

28. grein – Allsherjaratkvæðagreiðsla

Allsherjaratkvæðagreiðslu skal viðhafa:

- a) Við stjórnarkjör í félaginu.
- b) Við sameiningu félaga.
- c) Við kosningu fulltrúa á ársfund/þing ASÍ, AN og SGS.

Þegar stjórn félagsins eða lögmætur félagsfundur samþykkir að viðhafa allsherjaratkvæðagreiðslu. Slíkar atkvæðagreiðslur er þó aðeins hægt að viðhafa um mál sem lögð eru þannig fyrir að hægt er að svara já eða nei eða kjósa milli tveggja tillagna.

VII. Kafli – Félagsslit o.fl.

29. grein – Félagsslit

Félaginu verður ekki slitið nema 3/4 allra félagsmanna samþykki það að viðhafðri allsherjaratkvæðagreiðslu.

Verði samþykkt að leggja félagið niður skal Alþýðusamband Íslands varðveita eignir þess þar til annað stéttarfélag er stofnað með sama tilgangi á félagssvæðinu. Fær það félag þá umráð eignanna að áskildu samþykki miðstjórnar ASÍ.

Um úrsögn félagsins úr ASÍ eða samtökum sem aðild eiga að því fer samkvæmt lögum ASÍ.

Lögin þannig samþykkt á aðalfundi Einingar-Iðju 15. maí 1999 með áorðnum breytingum 2. maí 2002, 5. mars 2007, 20. nóvember 2007, 17. apríl 2012, 6. apríl 2017